

gifer, animal caloris impatiens, interdum solis aestu, nec non oestris culicibusve laccessitus, maximo, quo potest, cursu summa montium cacumina petit, ibique totam diem commoratur, glaciibus insistens. Quin etiam vegetabilia, caloris æque, ac rangiferi impatientia, harum glaciæ vicinitate magnopere delectari videntur; ut *Ranuncul. glacialis* et *nivalis*; *Gentiana glacialis*; *Salix herbacea*; *Agrostis algida*, quæ circa margines glaciæ læte vegetant, gratumque pabulum nivicolis Rangiferis atque Lagopodibus præbent.

§. 22.

Itaque varias plantarum species, in alpebus propter frigus atque tempestates, aliis autem regionibus ob siccitatem pubescere, animadvertendum judicavi. Nam omnis evaporatio acceleratur vento atque calore, quod locis aridis apricisque apparet. Immo spirante zephyro citius arefcit fœnum, quam aestu solis. Proinde exhalatio plantarum uberior locis apertis ventosisque, quam in umbra. Accelerata autem exhalatione, diminuitur aqua, et contrahuntur vasa; quo facto humores vel latices mucilaginoso-glutinosi, qui pubescentiæ elementum constituere videntur, aut siccitate aqua sua orhati, aut tempestatibus arefacti, pubescentiam edunt. Videmus etiam animalia quædam tempestatibus atque frigore vexata, crassiore vellere cir-